

Pembangunan ekonomi tidak harus jejaskan alam sekitar – PM

Oleh MAISARAH SHEIKH RAHIM
22 April 2022, 2:26 pm



Datuk Seri Ismail Sabri Yaakob

PUTRAJAYA: Datuk Seri Ismail Sabri Yaakob berkata, pembangunan ekonomi tidak harus menjasksan alam sekitar, manakala liputan kawasan hijau perlu dipertahankan.

Perdana Menteri berkata, usaha untuk mempercepatkan pertumbuhan hijau sejajar dengan Fokus Kelapan dalam Rancangan Malaysia Ke-12 (RMK-12).

Untuk itu, kata beliau, tindakan mempertingkatkan kemampuan tenaga dan mentransformasikan sektor air, harus kekal menjadi teras pembangunan sosioekonomi negara.

Menurut beliau, kerajaan akan terus memenuhi komitmen untuk mengurangkan intensiti pelepasan gas rumah hijau (GHG) sehingga 45 peratus kepada Keluaran Dalam Negara Kasar (KDNK) pada 2030, berdasarkan intensiti pelepasan 2005, selari dengan aspirasi menjadikan Malaysia sebagai negara rendah karbon.

“Saya sedar ini memerlukan usaha yang bersepada serta komitmen dan pelaburan hijau yang tinggi.

“Namun, saya yakin dengan penglibatan Keluarga Malaysia, komitmen ini akan memastikan Malaysia seiring dengan usaha negara lain untuk mencapai matlamat global dalam menangani perubahan iklim dan meningkatkan daya saing negara,” katanya dalam kenyataan bersempena Hari Bumi Sedunia yang disambut pada hari ini.

Ismail Sabri berkata, bagi meraikan sambutan hari berkenaan, beliau mengajak seluruh Keluarga Malaysia bersama menggembangkan tenaga dan menyumbang masa membudayakan amalan kelestarian demi kelangsungan generasi akan datang.

Beliau menjelaskan, amalan seperti menghindari penggunaan plastik sekali guna dan penjimatkan sumber tenaga perlu dijadikan kebiasaan dalam kehidupan.

Pada masa sama, beliau mengajak sektor swasta dan syarikat berkaitan kerajaan (GLC) untuk sama-sama memainkan peranan dalam usaha melestarikan alam sekitar.

“Saya mendoakan agar seluruh Keluarga Malaysia terus bersemangat memainkan peranan dan memikul tanggungjawab bagi mewariskan Malaysia yang lestari kepada generasi akan datang,” katanya.- UTUSAN